

Powšitkowne WOZJEWJENJA

njedźelu, 21. meje 2023

Wusyłanje Božej mše

Serbskorěčnu Božu mšu móža wěriwi tutu njedźelu, 21. meje, w 9.00 hodź. z Chróscic jako livestream scěhować. Link na nju je w interneće pod www.posol.de a na wosadnej stronje podaty.

Mejski nyšpor TCM

Towarstwo Cyrila a Metoda z.t. (TCM) přeprošuje na mejski nyšpor, kotryž budže tutu njedźelu, 21. meje, w 17.00 hodź. w Róžeńčanskej swjatnicy. Wšitcy su wutrobnje witani.

Modlenje w Róžeńće

Na modlenje swjateho różowca a před Najswećišim su wěriwi sobotu, 3. junija, we 18 hodź. do Róžeńčanskeje hnadowneje cyrkwy přeprošeni. Pačerje budu w serbskej a němskej rěči spěwane.

Ministrantska kopańca

Koparski turněr ministrantow ze serbskich wosadow budže sobotu, 24. junija, w Pěskcach. Započatk je w 9.00 hodź. z Božej mšu we wjesnej kapałce.

Putniska jězba

Na serbsku putnisku jězbu z duchownym přewodom wot wutory do pjatka, 18. do 21. junija, přeprošuje Radworske Šmitec busowe wozydłownistwo. Wobdźělnicy wopytaja klóšter Huysburg, Naumburski dom kaž tež měšće Halle a Hildesheim. Přizjewjenja přijimuje Šmitec wozydłownistwo, telefonowe čisło (03 59 35) 28 60.

Z busom do Krupki

Na putnisku Božu mšu srjedu, 16. awgusta, w 10.00 hodź. w Krupce pojedže zaso bus. Štóz chcył sobu jěć, měł so w Radworskim Šmitec wozydłownistwje přizjewić, telefonowe čisło (03 59 35) 28 60.

Filmowe rozpominanje

Pod hesłom „Žona – druha strona čłowjestwa“ přeprošuje Smochčanske kubłanišćo swjateho Bena na dny rozpominanja z filmom, kotrež wotměja so wot srjedy do njedźele, 21. do 25. junija. Přizjewjenja přijimuja hač do štwórtka, 1. junija. Link z nadrobnišimi informacijemi je pod www.posol.de wozjewjeny.

Pytaja kubłarku abo kublarja

Katolska wosada Marije kralowny różowca w Radworju pyta za swój džěcacy dom „Alojs Andricki“ k 1. junijej kubłarku abo kublarja. Městno je najprjedy hač do meje 2024 wobmjezowane. Džěłowy wobjim wučinja 30 hodźin wob tydžeń. Požadanja přijimuja hač do srjedy, 31. meje. Nadrobniše informacije su pod www.posol.de wozjewjene.

Darmotny zastup a wodženje w muzeju

Na Mjezynarodnym dnju muzejow njedźelu, 21. meje, budže tež zastup do Budyskeho Serbskeho muzeja darmotny. K tej přiležnosći su wšitcy zajimcy na wodženi po nowej wustajeńcy „Čej’ da sy?“ přeprošeni. W 15.00 hodź. poskića so tajke w němskej rěči a w 16.00 hodź. w serbskej rěči.

Putniska madona tež we Łužicy

K modlenju a na Bože mšě před kopiju postawy sławneje Fatimskeje putniskeje madony su wěriwi w juniju w Drježdžansko-Mišnjanskim, Zhorjelskim a Litoměřickim biskopstwje přeprošeni. Mjez druhim wustaja postawu njedźelu, 4. junija, w putniskej cyrkwi w Róžeńće, hdžež budže w 10.30 hodź. Boža mša a w 14.00 hodź. nyšpor; pónđzelu, 5. junija, na Božej mši w 19.00 hodź. w cyrkwi Marije donjebjeswzaća w Kulowje kaž tež njedźelu, 11. junija, w klósterskej cyrkwi klarisow w Budyšinje. Tam swjeća w 9.30 hodź. nyšpor a w 10.15 hodź. Božu mšu w pólskej rěči. Nadrobniši přehlad ze wšěmi městnami a Božimi službami je pod www.posol.de wozjewjeny.

Z kolesom putnikować

Na putnikowanje z kolesom přeprošuje Smochčanske kubłanišćo swjateho Bena wšitkich zajimcow wot njedźele, 24. septembra, do njedźele, 1. oktobra. Nawod změjetaj farar Thomas Cech ze Žitawy a Alojs Rječka z Łužnicy. Přizjewjenja přijimuju hač do pjatka, 1. septembra. Link k tomu a k dalším informacijam je pod www.posol.de wozjewjeny.

Wulět samostejacych

Wulět samostejacych ze serbskich wosadow budže wutoru, 6. junija, a powjedže do českeho Oseka. Wšitcy su wutrobnje přeprošeni, tež ci, kotřiž njejsu samostejacy. Zajimcy měli so pjatka, 26. meje, w redakciji Katolskeho Posola, telefonowe čisło (0 35 91) 55 02 12 přizjewić. Časowy plan busa a wsow, po kotrychž pojedže, budže njedźelu, 4. junija, w Katolskim Posole wozjewjeny.

Dalekubłanje na polu prewencije před seksualizowanej namocu

Prewencija přećiwo seksualizowanej namocy je wažny wobstatk džěła z džěćimi a młodžinu we wosadach. Jeje zaměr je, nowu kulturu wzajomneje zhromadnosće wuwijać. Za to su prewentiwne struktury a procesy trěbne. K tej temje poskića we Worklečanskim Don Boskowym domje dalekubłanja, a to na třoch terminach: sobotu, 10. junija, wot 13.00 do 16.00 hodź. kaž tež pónđzelu, 19. a 26. junija, stajnje wot 18.00 do 21.00 hodź. Z nich móža sej zajimcy jedyn termin wuzwolić. Wšitcy pomocnicy na nabožnych prózdninskich dnjach we wosadach, ale tež dalši čestnohamtscy, kotřiž maja z džěćimi a młodostnymi we wosadach zwisk, na přikład w sakristiji abo ze šolu, su cyle wutrobnje přeprošeni. Přizjewjenja přijimuju hač do pónđzele, 5. junija, online. Link k tomu kaž tež k dalším wažnym informacijam je pod www.posol.de wozjewjeny.

Sabina Lanzyna, referentka za pastoralku džěći

Přednošk wo podrywanju demokratije

„Kedźbu pasle! Kak prawicarscy ekstremisća a reichsbürgerojo demokratiju podrywaja“ rěka hesło zarjadowanja, kotrež wotměje so srjedu, 14. junija, wot 19.00 do 21.00 hodź. w Jakubetzowym wustawje w Kulowje. Referentaj wječora budžetaj dr. Harald Lamprecht, społnomócnjeny za prašenja swětonahlada Ewangelsko-lutherskeje krajneje cyrkej Sakskeje, a Christian Schäfer, trágerverBUNT – Syć za demokratiju a wšelakorosć w Budyskim wokrjesu. Link k nadrobnišim informacijam je pod www.posol.de podaty.